

Umhverfis- og auðlindaráðuneytið
Skuggasund1
150 REYKJAVÍK

Reykjavík, 22.2.2019
Tilvísun: 201902-0056/0.03.02

Umsögn um drög að frumvarpi til breytinga á efnalögum nr. 61/2013

Vísað er til draga að frumvarpi til breytinga á efnalögum nr. 61/2013 sem liggur fyrir til umsagnar á Samráðsgátt Stjórnarráðsins.

Vinnueftirlitið gerir eftirfarandi athugasemdir við frumvarpið:

Skilgreining á eiturefnaleyfi (1. gr.)

Í frumvarpinu er á mörgum stöðum vísað til eiturefnaleyfa sem Vinnueftirlitið gefur út sbr. 51. gr. laga nr. 46/1980 um aðbúnað, hollustuhætti og öryggi á vinnustöðum, hins vegar er það hugtak ekki skilgreint í 3. gr. efnalaga nr. 61/2013. Vinnueftirlitið mælir eindregið með að hugtakið *eiturefnaleyfi* verði skilgreint í lögnum til að tryggja samræmdan skilning á því um hvað er að ræða auk þess að tryggja gagnsæi og skýrleika í lagasmíðum.

Af framangreindum ástæðum þá leggur Vinnueftirlitið til að 1. gr. frumvarpsins verði breytt með eftirfarandi hætti:

Á eftir 27. tölul. b kemur nýr töluliður; tölul. 27. c, svohljóðandi: *Eiturefnaleyfi*: Leyfi veitt af Vinnueftirliti ríkisins til nafngreinds einstaklings eða fyrirtækis til að kaupa og nota eiturefni við framkvæmd vinnu.

Ný skilgreining á hugtakinu varnaefni (2., 4., 5., 6., 7., 8., 10., 11., 15., 16., 18., 19., 20., 22., 23., 24. og 27. gr.)

Í frumvarpinu er gert ráð fyrir því í mörgum ákvæðum þess að hætt verði að nota hið viðtekna hugtak *varnaefni* og í staðinn notað ýmist hugtakið *plöntuverndarvara* og/eða *sæfivörur* og/eða *útrýmingarefni til notkunar í atvinnuskyni* og *hættuleg efni*. Í greinargerð með frumvarpinu kemur fram að þetta sé gert m.a. til einföldunar og til að hafa sambærilega notkun á hugtökum og fram kemur í ESB gerðum sem lögin byggja á. Stofnunin er ekki sammála því að það verði til einfölduna að leggja af hugtakið *varnaefni*, þvert á móti telur

Vinnueftirlitið að það sé til einföldunar að notast við hugtakið varnarefni enda er það með skýrum hætti skilgreint í núverandi efnalögum.

Vinnueftirlitið vill einni benda á að skv. reglugerð nr. 980/2015 um meðferð varnarefna ber stofnuninni að hafa eftirlit með notkun, meðferð og varðveislu varnarefna á vinnustöðum. Var reglugerðin sett á grundvelli efnalaga nr. 61/2013 og laga nr. 46/1980 um aðbúnað, hollustuhætti og öryggi á vinnustöðum. Ef skilgreining á hugtakinu varnarefni mun breytast í efnalögum þá mun það þýða að framangreind reglugerð verður ekki lengur í samræmi við efnalög nr. 61/2013.


Með vísan til alls framangreinds þá leggur Vinnueftirlitið til að notast verði áfram við hugtakið varnarefni í efnalögum nr. 61/2013.

Öryggisblöð (12. gr.)

Samkvæmt 10. gr. reglugerðar nr. 553/2004 um verndun starfsmanna gegn hættu á heilsutjóni af völdum efna á vinnustöðum skal atvinnurekandi sjá til þess að öryggisblöð séu til staðar á vinnustöðum. Tilgangurinn með því er að upplýsa starfsmenn um þær hættur sem stafa af varasömum efnum og hvernig ber að forðast þær. Það er mjög mikilvægt fyrir heilbrigði og öryggi starfsmanna að þeir geti kynnt sér þær upplýsingar sem fram koma í öryggisblöðunum. Af framangreindum ástæðu þá leggst Vinnueftirlitið gegn því að aflögð verði sú skylda að öryggisblöð skuli vera á íslensku, þar sem starfsmenn á Íslandi skilja ekki allir ensku, norsku, dönsku og sænsku. Að auki er bent á að meirihluti þeirra erlendu starfsmanna sem hér vinna koma frá Austur Evrópu og þeir skilja síður Norðurlandatungumál og ekki allir ensku. Því er nauðsynlegt að hafa öryggisblöð á íslensku bæði fyrir íslenska starfsmenn og til að íslenskir atvinnurekendur og starfsmenn geti leiðbeint erlendum starfsmönnum sem skilja ekki íslensku um það sem fram kemur á öryggisblöðunum.

Að öðru leyti gerir Vinnueftirlit ríkisins engar athugasemdir við þessi drög að frumvarpi til breytinga á efnalögum nr. 61/2013 að svo stöddu.

Virðingarfyllt
f.h. Vinnueftirlitsins


Jóhannes Helgason


Björn Þór Rögnvaldsson